



SAOPĆENJE ZA JAVNOST

20. mart 2024.

Potvrđena optužnica za razbojništvo Uz prijetnju pištoljem opljačkao kladionicu

Tužilaštvo Brčko distrikta BiH podiglo je optužnicu protiv Marka Stanimirovića (20)* zbog sumnje da je prošle godine u Brčkom, uz prijetnju pištoljem opljačkao kladionicu *Meridian*, kao i radnice u tom objektu. Optužnicom potvrđenom pred Osnovnim sudom, on je optužen da je silom, uz upotrebu oružja, oduzeo novac i mobitele dviju radnica, počinivši teži oblik krivičnog djela razbojništva.

Optužnicom od 12. marta, Stanimiroviću je stavljeno na teret da je 23. juna 2023. godine, u ulici Nikole Tesle, upotrebom sile prema radnicama sportske kladionice *Meridian* oduzeo 660 KM gotovog novca. Usto, on je od radnica koje su se zatekle u objektu, uz prijetnju upotrebom pištolja, oduzeo i mobilne telefone u vrijednosti približnoj iznosu oduzetog novca. Kako se navodi u optužnici, Stanimirović je oko 23:30 sati, u namjeri pribavljanja protivpravne imovinske koristi, s fantomkom na glavi i pištoljem u ruci, ušao u prostorije kladionice, gdje je zatekao radnice O. D. i Z. Z, kao i dva gosta. Zatim je, uz prijetnju pištoljem prema prisutnima, od radnica tražio novac, nakon čega mu je jedna od njih predala kovertu s gotovinom u iznosu od 660,00 KM. On je, potom, od obje radnice oduzeo mobilne telefone vrijednosti od oko 300,00 KM, odnosno oko 360,00 KM, a zatim napustio objekat, pribavivši protivpravnu imovinsku korist - zaključuje se u optužnici.

U intenzivnoj saradnji s Policijom Brčko distrikta BiH, krivično djelo brzo je rasvijetljeno, a počinitelj već sutradan identificiran i priveden od strane organa gonjenja. S obzirom da je pri izvršenju krivičnog djela upotrijebljeno oružje, po okončanju istrage, Tužilaštvo je optužilo Stanimirovića za teži oblik razbojništva (*iz člana 283 stav 2 Krivičnog zakona Brčko distrikta BiH*), tereteći ga da je upotrebom sile i prijetnjom da će direktno napasti na život i tijelo neke osobe za sebe pribavio protivpravnu imovinsku korist u iznosu od oko 1 320,00 KM. Pošto je u cijelosti potvrdio optužnicu, Osnovni sud Brčko distrikta BiH nastaviti će postupak u ovom slučaju zakazivanjem ročišta za izjašnjenje o krivici optuženog.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

GLAVNI TUŽILAC
ZEKERIJA MUJKANović